

Elschtere

Fasnacht 2015

Nasegrübler_Gugge, Laufen



Mir Elschtere chlaue das wo glänzt und funklet
z'Liestel, z'Basel ischs o so, wird gmunklet
Sie hei Gäld wie Heu im Regierigsrot

doch uf d'Spese rächnig chunnt no s'Znüibrot.

Jo die Spese glänze, funklet wirklich toll

drum bechömmet die d'r Schnabel gar nit voll

Mir Elschtere stöh me uf Edelstei

so fadi Spese si eus E'nerlei

s'Laufner Stedtli isch ä graue Fläck

doch suber isch's, es het kei Dräck

Zum dä Ort chli attraktiver z'gschtalte

duet Laufe diversi Sache verwalte.

Ä Bliemli dört, ä Farbtupfer do:

und doch si nit alli wirklich froh.

Denn grad dört wo'd wotsch parkierä

duet d'Stadt ä Bänggli ane platzierä.

S'Bänggli isch guet für ne gmietlichs Fescht

Doch ei Parkplatz wäg, scho gits Protescht

Mir liebes mit em Schnabel z'hagge

und uf das schöne Bänggli z'g...

Lueget nit ume

dr Sheriff goht ume

Ä Biessli do und no eis dört

mir hei alli scho vonem ghört

jetzt het er ä Ghilf

und stoht nüm im Schilf

dr Hilfs-Sheriff isch immer i dr Nöchi

jetz ischs ä Duell uf Auge höchi

Sie si untrennbar bim biesse z'Laufe

Drum diemer dä «Dr Schatte vom Wey» taufe

Uf dä hei mir jo gar nit blangt

hei Angscht, dass r Elschtere fangt

Bim Fleury go ässe

hesch chönne vergässe

doch d'Rettig isch noch

und d'Hoffnig isch hoch

Zwölf Gricht het dr Bumä bstellt

so het's dr Regio-TV Däni verzellt

Zue mache hätt'r sölle nämmlig

he jo das isch jo wie im Lämmli

Eus Elschtere duet das nit verschregge

Mir frässe Würm, ohni z'verregge

D'Ching vom Serafin die bluete

das isch vom Schuelwäg, chönnt mä vermuetet

ä Blätz ab do, ä Blätz ab dört

d'Elterä, die si empört:

Ä richtige Pauseplatz isch das nit,

aber Hauptsach d'Architektur isch ä Hit

Architektur duet eus nit intressiere

nur was glänzt die mir a-stiere

Zobe am foifi, es isch ä Seich,

statt Musig ghör i nume d'Bettina Speich.

Sie mäldet Stau zwüsche Basel und Laufe

Es isch zum Hüle und Hoor usrauffe

Am Donnchtig staut's, s' het wieder dätscht

Am Fritig stoht d'polizei, die git dir dr Räscht

und am Samschtig die sie flissig holze

so chumm i jo gar nie meh zum Bolze

Und wotsch is Thierstei ischs zum gränne

ab liebschte würdi d'Stross z'Brislach spränge

... und übrigens, das isch ä gueti Frog

weiss öper wies mit em Bahnhof witer goht?

Wenn die Baustell erscht mol stoht,

denn ghesch i dim Chare nume no rot.

Als Fädertier loht eus das chalt

mir fahre nit, mir fliege halt!

Schwümme, secklä und hart trainierä,

das duet me alles usprobierä.

Angers, weniger oder gsünger ässe

nützt o nüt, das chasch vergässe.

Weight Watchers het me o probiert,

doch alles blibt glich, nüt isch passiert.

Drum suech i Hilf inere Färnseh-Sändig

«Puls» heisst die, ig lueg se ständig.

Do haut's mi chürzlich fascht vom Hocker

ghesch d'Asprion, die verzellt do locker

vo Cremli wo mä sett ijschmire

nei, nit gege d'Wampe oder für is Gsicht

das wär jo no ä schöni Gschicht.

Nei, bi euserer Laufner Elite

gohts – do stuunsch – um Cellulite

Als Elschtere – do hei mir Glügg

gits a de Bei halt keini Bugg!

Wenn d'Iibrächer hüt ä Huus die ruume

cha dr Bsitzer ganz fescht stuune

d'Polizei duet numme ä Zügnis mache

wo zeigt was fehlt an schöne Sache

Chönsch meine Diebstahl isch ä neue Bruef

das Arbeitszügnis hebt im Dieb si Ruef.

Jetzt gits d'Bürgerwehr mit Mässer und Schwärt

mit Faceb_ook und Twitter, aber s'het kei Wärt:

D'Diebe lache sich dumm und dämlich

über d'Bürgerwehr vo Röschenz nämlich.

Denn hole si mol eine vo dr Pischte,

landet dä Sürmel gar nit i dr Chischte.

d'Schmier loht se lieber wieder fahre

will me wot d'Gfängnis-Chöschte spare.

Mir säge euch, als diebischti Elschtere:

So cha me Langfinger nit vergelschtere